

U Bosni i Hercegovini ne postoji dobro ako nije dobro za sve. Bosna i Hercegovina je naša zajednička domovina.

Naša Stranka ostaje privržena temeljnim principima i ciljevima iz svog programa, a danas dovršava svoje političko profiliranje.

Izazovi savremenog svijeta i aktuelni problemi bosanskohercegovačkog društva traže kompleksnu ideološku matricu koja će omogućiti integralni razvoj društva, socijalnu pravdu, jednake šanse i egzistencijalni minimum za sve, solidarnost, individualne slobode i ravnopravnost kolektiviteta.

Bit društvene krize u Bosni i Hercegovini je kriza političkog faktora. Etablirane stranke nisu sposobne naći rješenje. Postizborna agonija to samo potvrđuje. Suprotni strateški ciljevi, ignoriranje ili negiranje interesa drugog i drugačijeg i nespremnost na kompromis uveli su društvo u stanje opšte neisgurnosti. Politička kriza dosegla je dramatičnu tačku. Na nedopustiv način dovode u pitanje sudbinu zemlje. Očito je da vladajuće politike ne mogu ostvariti dobro, ne mogu izvršiti reforme i potaknuti razvoj. Ta nesposobnost je posljedica njihovog karaktera, tj. njihove političke filozofije, temeljnih vrijednosti, orijentacije, ciljeva i modela ponašanja u praksi. Poptuno ignoriraju opšti interes i manipuliraju tzv. nacionalnim interesima ili pseudgrađanskim i liberalnim vrijednostima. Iza toga se kriju klijentelizam i orijentacija na lične i partikularne interese. Zato Bosna i Hercegovina treba treći put – autentičnu demokratiju i svebosanskohercegovačku orijentaciju. Taj cilj traži novu politiku i nove ljude, integralizam, otvoreno društvo, prihvatanje evropskih standarda i njihovu realizaciju. To je model koji se temelji na dogovoru i kooperaciji, a ne na monopolu i isključivosti, koncept istinske demokratije, potpuno drugačije političke filozofije, metoda rada i ponašanja na javnoj sceni. U tom pristupu se bavljenje politikom tretira prvenstveno kao misija za rješavanje društvene krize i stvaranje uslova za razvoj, a odgovornost kao vrhunski princip. Nužno je reafirmirati opšti interes, univerzalne vrijednosti i princip kompetentnosti, vratiti moral u politiku s nultom tolerancijom na korupciju, državne institucije osloboditi tutorstva politike i stvarati društveni ambijent u kojem se prirodni resursi i individualni potencijali mogu realizirati. U metodu rada treći put promovira kulturu dijaloga, kooperaciju, principijelni kompromis, konsenzus, paritet. Zagovaramo evropsku klauzulu i prihvatanje principa na kojima je uspostavljena i na kojima funkcioniše EU, te poštivanje standarda iz Evropske konvencije o ljudskim pravima. Treći put podrazumjeva kritičku valorizaciju tradicionalnih vrijednosti bosanskohercegovačkog društva.

Prihvata se činjenica da su u posljednjih 20 godina u Bosni i Hercegovini stvoreni novi politički realiteti, ali odbacuje imperativ tih realiteta da bi se oslobodio prostor, tj. energija za razvoj društva i kreativnu evoluciju. Naša Stranka je profilirana kao građanska stranka i nedvosmisleno je opredijeljena za građansku državu, ali uvažava aktuelni realitet u Bosni i Hercegovini. Zato smatramo da je u ovoj prelaznoj fazi nužna ideološka i politička kohabitacija.

To zahtjevaju postojeći odnos političkih snaga i dominantno stanje društvene svijesti. Nacionalno pitanje je važan društveni problem koji se može optimalno riješiti jedino kroz model zajedničke budućnosti na principima ZAVNOBiH-a i važećih standarda Evropske Unije o ljudskim pravima i pravima kolektiviteta.

Kolektivni identiteti su prirodno stanje društvenog bića Bosni i Hercegovini, pa je dosljedna ravnopravnost ovdje istorijski imperativ. No, u aktuelnom trenutku je nužno reafirmirati pluralnost individualnih identiteta i interesa. Naša Stranka je eksplicitno protiv teritorijalizacije etničkog principa, a za precizno definiranje pojma vitalnog nacionalnog interesa i za institucionalnu zaštitu tih interesa da bi se izbjegle zloupotrebe i blokada vlasti. Funkcionalna i racionalna decentralizacija države Bosna i Hercegovina može se ostvariti formiranjem prirodnih administrativnih oblasti, po modelu evropskih regija, na savremenim kriterijima (geografski, prometni, ekonomski, demografski), a ne isključivo ili dominantno na tzv. nacionalnom principu.

Realizacija Trećeg puta podrazumjeva okrupnjavanje na političkoj i društvenoj sceni u Bosni i Hercegovini. Atomizirani politički subjekti i disperzija glasova na izborima idu na ruku etabliranim strankama. Da bi se to prevladalo Naša Stranka će inicirati proces ujedinjavanja stranaka iste ili slične ideološke orijentacije i sličnih programa, odnosno stvaranje političkog saveza sa strankama, organizacijama i društvenim grupama koje prihvataju ideju trećeg puta za Bosnu i Hercegovinu.